



**Ukioq 2025-imiit nutaamik umiarsuarmik sinersortaateqalernissaa siunertaralugu Naalackersuisut pilersaarummik suliaqarnissaannik Inatsisartut aalajangiiffigisassaattut siunnersuut, taamaasilluni pilersaarut kingusinnerpaamik UKA 2023-imi saqqummiunneqassalluni.**

(Inatsisartunut ilaasortaq Anders Olsen, Siumut)

(Siullermeerneqarnera)

Qujanaq Inatsisartunut ilaasortamut Anders Olsen-imut ilaasunik angallassineq ukkataralugu siunnersuuteqarneranut.

Siunnersuutip ukkataraa nutaamik umiarsuarmik sinersortaammik pisisoqarnissaa. Isumaqarpunga, pingaartuusooq, tamatigut ataatsimut isigisassasugut, ilaasunik angallassineq oqaluuseritillugu.

Maannakkorpiaq Qaqortumi, Nuummi Ilulissanilu nutaanik mittarfiliorpugut, uagullu Demokraatinik kissaatigalutigu, aamma Tasiilami Ittoqqortoormiinilu mittarfiliortoqarnissaa. Pingaartuuvoq ataatsimut isigaluni taakku ilanngunnissai siunissami ilaasunik angallassisarnissamut pilersaarusionermermi. Puigussanngilarput, aamma uani aningaasaq apeqqutaammat. Paasiniartariaqarparput, qanoq isilluta inuiaqatigiit, akikinnerpaammik angalasinnaanerisa qulakkeernissaat.

Pingaartuuvoq, maani nunatsinni innuttaasutut nammineq nunatsinni angalasinnaanissarput ukiumi arlalinni ileqqaanngikkaluarluta. Taamaattumik mianersuutigissavarput aalajangerluinnarnissarput soorlu assersuutigalugu nutaamik umiarsuarmik sinersortaammik pisinissamut. Misissuinerimmi takutissinnaammassuk, angallassissut alla imaluunniit umiarsuaq minnerusoq tulluarnerusoq angalanerup akikillisinnaanut.

Maluginiarpara, Naalackersuisut allannguutissatut siunnersuuteqarsimasut, Demokraatit eqqarsaataannut assigusumik. Siunnersuutigerusuppara, ataatsimiititaliap siunnersuut taakku marluk suliarissagai, immaqalu namminneq allannguutissatut siunnersuuteqarlutik, siunnersuutit taakku marluk katigullugit.

Taamatut oqaaseqaateqarluta siunnersuut Sanaartornermut ataatsimiititaliami suliareqqitassatut innersuussutigaarput.